

TE HEHEURAA API.

“Aita a te Fatu ra a Iehova e peu i rave maori râ ia faaite i ta’na parau i moe i ta’na ra mau tavini i te mau peropheta.” Amosa 3: 7.

Nu. 1.

10 Atopa 1907.

Mat. 1.

Te Parau Mau.

Ei parau mau ta te taata paatoa nei e maitai ai. Hoê noa iho ravea e manuïa tamau noa’i ta te taata nei ohipa, oia hoi ia faatumuhia oia e ta’na mau ohipa atoa i roto i te parau mau. O te parau mau ana’e ra e tia i te vairaa e a muri noa’tu. O te mau parau haavare atoa nei, e faaorehia ïa, e te mau huru ohipa atoa i faatihia i nia i te parau haavare ra, e hurihia ïa i raro. E manuïa rii ta te taata haavare ra mau ravea paari, aita râ e maoro e ua itea to’na huru mau e ua hahau ê te taata i ta’na mau marei tafifi ra.

Te taata hoo tao’a o te tuu noa i te faito haavare i ta’na ra hooraa e roaa ia’na te roo ino i rotopu i te taata atoa, e faarue to’na mau tavini hoo ia’na e e ho’i ta’na ohipa hooraa i te iti. E na reirahia hoi te feia hoo i te matete râ o te tuu tapuni noa i te mea ino e te mea pê i raro roa i te farii e te faanahonaho i te mea maitai rahi roa’tu i nia iho. E ore ïa te feia e hoo mai i te reira e mauruuru a iritihia’i te mea ino no raro mai, a ite ai hoi ratou e ua haavarehia ratou. E tuu atu ai ratou i ta ratou moni ua te feia hoo o te haapao noa i te mea tia.

E manuïaraa iti poto nei ta te haavare ra, o te parau mau e te ohipa tia ana'e râ te tia i te vairaa. Te mau huru ohipa atoa nei i patuhia i nia i te haavare ra e mairi ïa i raro; E maoro noa'tu te paturaa, o te reira ïa, e e poto noa'tu te paturaa, o te reira hoi ïa, e mairi ïa i raro. E aeho paruparu ïa te haavare, e ore ïa e au ia faarirohia ei tauturu no te taata.

Te anoinoihia ra te parau haavare i roto i te mau huru ohipa atoa a te taata nei. Tei roto ïa i te ohipa hooraa tao'a, e tei roto atoa hoi ïa i te ohipa a'oraa evanelia. Ua pee te tahi pae taata i ta te parau mau e te ohipa tia, e ua pee hoi te tahi pae i ta te parau hape e te ohipa haavare ra. O te hinaaro ia faatumuhia ta'na mau ohipa i roto i te parau mau, ia *Hi'opoa Maite* oia e tia'i, e ite papu ai oia i te mea mau e te mea haavare, e tia'i ia'na i te farii mai i te tahi e te faarue ê atu i te tahi.

E ore ïa te taata a faufaahia o te tiaturi i nia i te parau hape. Rahi noa'tu e papu rahi noa'tu â hoi to'na ra tiaturiraa i roto i to'na iho mana'oraa, e faaerehia'i oia, mai ta te feia maohi i te fenua Amerika i faaerehia'i, o ratou i tiaturi noa i nia i te parau haavare i haapiihia'tu ia ratou ra, mai tei faatiahia mai i raro nei.

E maha hanere matahiti e te tiahapa i mairi a'enei ua taatahia te fenua Amerika i te feia maohi ana'e; te parahi ra ratou i roto i te mau puhapa iri puua, aita rea to ratou e ahu ia ahu, te i'a o te mau anavai e te puaatoro oviri o te mau fenua papu rahi ra ta ratou maa. E tô papaa tei faaapuhia e ratou ra, aita râ ratou i ite maitai i te ohipa faapupu maa ra. Aita hoi ratou i parahi tamanu noa i te vahi hoê, te faapuhapâ haere noa râ ratou i tera vahi i tera vahi. Tera ta ratou ravea e roaa mai ai te puaatoro oviri, te maa hinaaro rahi na ratou ra, oia hoi na roto i te te'araa i te te'a e puta'i te puaatoro ra; E ohipa rave atâ ïa te roaaraa mai, no te oviri roa o te mau puua ra, e ore e tia'i i te taata ia haafatata mai e puta'i te te'a ia te'ahia ra, e aore rea te

vahi tapuniraa i te mau fenua papu rahi i haere-noa-hia e taua mau puua ra.

Ia tapae maira te mau papaa tei to ratou rima te pupuhi e tia noa'i ratou i te vahi atea roa'tu e pupuhi noa'tu, e e puta ia; ua roaa ohie maira ta ratou maa. Tupu a'era to te taata maohi nounou i te pupuhi; haapue iho'ra i ta ratou auro e hoo, aita râ te papaa i hoo atu; ua mata'u o te faa-enemi mai te feia maohi e o te pau hoi ratou i te pupubihia no te mea ua iti ratou e ua rahi roa'tu te feia maohi. Ua tupu râ to te tahi pae papaa haapao ore ra nounou i te auro rahi i roto i te rima o te feia maohi (ua parauhia hoi ratou e mau Initia) e ua feruri ihora ratou i te tahi ravea paari e roaa mai ai ia ratou te auro e e faaerehia hoi te mau Initia i te pupuhi. Tera hoi ta ratou ravea paari ra: Ua hoo atura i te tahi mau pupuhi i te mau Initia ma te faateiaha roa'tu i te hoo, aita râ ratou i hoo atu i te paura aita hoi i faaite noa'tu e ia tuuhia te paura e te ofai i roto i te pupuhi e tia'i. Faufaa ore roa ia te pupuhi aita e paura e te ofai. Aita râ i maoro e ua itea te papaa i te tuuraa i te mea i roto i te pupuhi a pupuhi atu ai, e ua haapue faahou ihora te mau Initia i ta ratou auro ei hoo. Aita râ te mau papaa e hinaaro ia hoo atu i te paura, o te tupu to te mau Initia au ore e o te tama'ihia mai hoi ratou ra e haapau-roa-hia'tu ai.

Ua nounou râ i te auro a te mau Initia ra e no reira na tuu atura i teie parau haavare, ua na ô atura, e huero ia te paura no nia i te tahi raau i to matou fenua e e tupu paha hoi i teie nei fenua; e tao'a rahi ia, e aita ta matou e navai ia hoo atu; mai te mea râ e hinaaro outou i te tahi vahi iti ei tannu i roto i te faaapu, e hoo atu ia matou. Ua hoo atura i te tahi vahi iti paura ma te faateiaha roa i te hoo; E no te mea ua tiaturi papu a'era te mau Initia i taua parau a te mau papaa ra, hamani ihora ratou i te tahi faaapuraa e tanu ihora i te paura i raro i te repo mai te mea ra e e huero tupu, a tia'i noa'i i te tau e hotu ai. Aita râ i tupu e aita hoi i hotu e inaha noa nei,

HISTORIAN'S OFFICE LIBRARY

The Church of Jesus Christ of Latter-day Saints

13238

no te mea e ere te paura i te huero tupu e e mea pê noa ia ia rarirari i te repo. Ua tiaturi ratou i nia i te parau haavare, oia hoi i nia i te parau e e huero tupu te paura, ua riro ta ratou auro, e aita roa te hoê mea faufaa i roaa mai.

E na reirahia hoi te feia atoa o te faariro i te parau hape ei tiaturiraa e ei tumu rave ohipa na ratou ra. E faaerehia ratou i te mea e tia-noa-hia ra no te mea ua faariro ratou i te mea mou noa ei tiaraa, e ua taa ê i te parau mau o te tia i te vairaa e a muri noa'tu. Ua faaere-atoa-hia hoi te mau papaa o tei tuu noa'tu i taua parau haavare ra. Ua riro ia ratou te auro a te mau Initia ra, aita râ ratou i fau-faahia i te reira no te mea aita i maoro e ua itea i te mau Initia e ua haavarehia mai ratou ra, e no reira ua faatama'i atura e haapau atura i ta ratou mau faaapu e to ratou mau fare parahiraa i pau ai ratou e ta ratou faufaa atoa ra, a pohe roa'i hoi te tahi pae.

Hoê noa iho haapaoraa e au na te taata; tera ia, a imi hua, a hi'opoa maite, a tiaturi noa'i hoi i nia i te parau mau e te ohipa tia, a ohipa ê atu i te parau hape e te ohipa haavare ra.

Ua faautuahia te sotaiete te hamani i te mori arahu i te fenua ra o Amerika e aufau ratou ua te hau i e piti ahuru ma iva milioni e piti hanere e maha ahuru aore tausani tara (\$29,240,000.00) moni auro. No te haapao ore i te ture o te fenua taua sotaiete nei i faautuahia'i.

E manuïaraa poto nei to te haavare e te ohipa tia ore ra. Ua manuïa roa te mau ravea haavare e te mau titaurationa tia ore a Eugene Schmitz, te tavana oire no San Francisco, Tarafonia, i tao'a-rahi-hia'i oia. I teie nei râ ua mau oia i roto i te fare auri, e ua faautuahia oia i te utua tapea e pae matahiti. No ta'na mau titaurationa tia ore e no to'na fariihuna-raa hoi i te moni o te mau sotaiete rarahi, o tei hinaaro ia faatiahia e te hau ta ratou mau ravea e manuïa'i ta ratou ohipa, i faautuahia'i oia.

TE HEHEURAA API.

I neineihia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

Farani Tuterera, Faatere. 10 Atopa 1907. Iosepha Viritiso, Tauturu.

No Teie Nei Vea.

Na te feia atoa e parahi i te mau fenua moana nei i raro a'e i te tamaru o te Hau Farani i Oceania, la ora na tatou i te aroha taeae.

Te tuuhia'tu nei teie nei vea i rotopu ia outou na mai te hinaaro ia riro ei maramarama na te aau taata, e ei faaito itoraa i te raveraa i te mau ohipa maitatai atoa nei, e ei faatupuraa hoi i te parau-tia i roto i teie nei paeau o te ao nei. E mea tia roa ia ia faaitehia i roto i teie vea matamua te tumu i opua'i matou, o te mau orometua o te Ekalesia a Iesu Mesia i te Feia Mo'a i te Mau Mahana Hopea Nei, i te rave i teie nei ohipa neneiraa vea.

Aore teie nei vea i neneihia ei ravea e roaa mai ai ta matou moni. Te mau parau atoa e hope roa'e e neneihia i roto i teie nei vea, e papaihia ia ma te moni ore. Na roto i te aau aroha noa e papaihia'i. Te horoa noa'tu nei matou i to matou taima i te ekalesia ma te moni ore. Te moni iti e titauhia ei hoo i teie nei vea, oia hoi e piti toata moni farani i te matahiti hoê, e pau ia i te hooraa i te pepa, te inita, te mau auri tamau parau, te haamonoraa i te mau auri neneiraa i ino, te mau taihaa rii o te piha neneiraa, e i te fare vea, no te opere-haere-raa i te mau vea i tera utuafare i tera utuafare, i tera fenua i tera fenua.

Aore hoi i neneihia ei ravea e mana'i matou i nia i te

taata. E feia tonohia mai matou; aita te hoê o matou i haere noa mai i te mau fenua moana nei no to'na iho hinaaro, i te mana'oraa e roaa mai ia'na te tahi mea e faufaa-hia'i oia. Te tonohia maira râ matou e te peropheta a te Atua, e ia tae mai te parau a taua peropheta ra e ho'i, ua ho'i faahou atu i te fenua a'ia ra.

Aore hoi ia e neneihia ei ravea e roaa mai ai te roo maitai. Te tae maira matou e te reva'tura e te monohia ihora hoi matou, e moni rahi ta matou iho i pau i te parahiraa, e aita roa te hoê vahi faufaa iti noa'e i roaa mai maori râ te mauruuru o te feia e farii mai i te parau maitai i haapiihia'tu e matou ra. Aita râ te roo maitai e roaa mai i ô nei e pee atu ia matou ia reva'tu matou i to matou iho fenua mau.

Tera râ, tei raro nei, te tumu e nenei ai matou i teie nei vea, TE HEHEURAA APÎ:

1. Ei faaiteraa'tu i te taata atoa e ua tae mau maira i nia i te fenua nei te melahi, i papaihia te parau no'na i roto i te Apokalupo 14: 6, 7; tei na ô maira e, "Hi'o atura vau i te hoê melahi i te maueraa na ropu i te reva nei: ma te evanelia e tia i te vairaa ra ei pororaa'tu i te feia e parahi i te ao nei ra, i te mau fenua atoa, e te mau opu atoa, e te mau reo atoa, e te mau nunaa atoa, i te pii-hua-raa te reo e, A mätä'u i te Atua, e faahanahana'tu ia'na; ua tae hoi i te hora faautuaraa na'na ra: e haamori outou ia'na, i tei hamani i te ra'i, e te fenua, e te tai, e te mau pape pihaa ra."

2. Ei faaite-papu-raa i te taata atoa e ua faaite faahou maira te Atua i to'na huru mau i te taata nei i teie nei anota hopea nei. Na roto ia i te parau vaha noa a te Atua Mana Hope ra taua faaiteraa ra. E ua faaho'i maira hoi oia i ta'na ra evanelia mau, o te mea ia e faaauhia'i te taata nei i to te Atua ra huru.

3. Ei tahoêraa i te mana'o o te taata nei ia au maite i te parau mau e te ohipa tia; ei faatupuraa ia i te parau-tia ra.

4. Eī faaitoitōraa i te taata atoa ia imi hua e ia hi'opoa maite hoi i te mau parau maitatai atoa nei. Eī haapiiraa'tu i te taata atoa e e maitai rahi tei te ite e te paari e te aravihi i te raverāa i tera ohipa maitai i tera ohipa maitai.

5. Eī faaitoitōraa hoi i te taata atoa ia itoitō roa ratou i te raverāa i te ohipa rima e ruperupe ai te fenua nei, e viti-viti roa'i te parahirāa taata, e e faufaahia'i hoi ratou ra, e riro ai te feia amutarahu ei feia tiamā, e ei toea hoi ta ratou ia tuu noa'tu i tera ohipa maitai e i tera ohipa maitai, e riro ai ratou ei feia tauturu noa i te mau huru ohipa maitatai atoa ra.

6. Eī faatupuraa i te hau i rotopu i te taata nei; ia aurohia te feia mana o te fenua nei; ia haapao noa hoi te taata atoa nei i ta ratou iho mau ohipa mai te haapeapea ore i ta vetahi ê ra.

7. Eī haapiiraa'tu i te huru haapaorāa e au i te taata paari o te hinaaro ia tupu to'na maitai i te rahirāa, oia hoi, te huru haapaorāa e etaeta roa'i te tino nei, e maramarama'i te mana'o, e e oaoa noa'i te aau i te mau mahana atoa e hope roa'e o teie nei orarāa.

8. Eī faaitoitōraa i te taata atoa ia imi noa ratou i te maitai no te taatoarāa, eiaha no ratou ana'e ihora.

9. Eī faaiterāa'tu hoi i te mau parau apî i tupu i te mau fenua êê o teie nei ao; te mau tama'i, te mau ohipa rarahi, te mau ferurirāa hohouu, te mau ati, te mau peapea, te mau mârôraa rarahi te maitai e te ino i te mau fenua o te ao nei, te aueuerāa fenua, te mau fenua pau miti, te mau mou'a auahi, te mau ravea paari a te feia ite e te mau peu maitatai a te feia parau-tia i tera fenua i tera fenua.

E na reirahia teie nei mau parau atoa nei i te neneihia peneia'e o te tupu to te taata taio ra mana'o papu e tei te ite e te paari e te haapao maitai te maitai rahi i te vairāa, e e roohia te feia haapao ore i te oto, te mauui e te haama rahi, e peneiae hoi o te fariu mai i te Atua a pee atu ai i te taahirāa avae o te Tamaiti o te Atua Ora ra, o Iesu Mesia.

Te Mau Parau Rii Api.

E maha hanere hoê ahuru ma maha milioni e toru ahuru ma iva tausani e pae hanere e vau ahuru ma hoê (414,039,581) tone arahu papaa tei iritihia mai no roto mai i te mau apoo arhu hohonu i raro a'e i te fenua i teie matahiti 1907, i roto i te Mau Hau i Amuihia, i te fenua ra o Amerika.

Ua manuia roa te ohipa faaapu i te fenua Amerika i teie nei matahiti 1907. Te rahi o te sitona, te vavai, te puaa e te mau mea i faaapuhia ra, ua tae ia i te pae tausani milioni e aore râ i te ono tausani milioni tara moni auro. Aita te mau mea i hamanihia e te rima taata i amuihia i roto i te reira taioraa; no te faaapu ana'e râ te reira.

Ua parauhia e, ua tupu faahou te ma'i pohe i San Francisco, Tarafohia, e i Honolulu, e i te mau fenua ra i Chili, e i Peru, e i Japone, e i Formosa e i te fenua Tinito. Ua ara maite râ te mau taote hi'opoa ratere e ua faaitoito ratou i te faaoreraa i taua ma'i pohe ra ia ore ia parare i tera vahi i tera vahi. Ua mana'ohia e na te iore i hopoi i te ma'i i San Francisco, no te mea ua itea te tahi mau iore pohe roa i roto i te pahi o tei mana'ohia e e pohe ma'i.

Ua faaitehia maira e ua tausani te taata i te fenua ra i Korea i uruhia e te demoni. Ua parauhia ia o te fenua tupapau o te ao nei. E mea aroha te faarooraa i te autâ e te auê o te feia i uruhia e te mau demoni i te rui, i ta te taata faaroo taria parauraa. O te huru hopea ia e tae mai i nia i te feia hiohio o te iimi noa i te parau no te feia i pohe ra. O te vahi ia e ô mai ai te mau varua iino i roto i te tino taata e faahuru ê roa i te mana'o e te haapaoraa a te taata i uruhia ra. Ua fatata roa taua fenua ra i te fenua Japone.

Ua roohia te tahi mau vahi i te fenua Japone i te pape pue rahi. E 79,654 taata i te oire ra o Tokio ana'e te faaamu-noa-hia nei e te mau to-mite i maitihia ei poihere ia ratou. Ua pau roa to ratou mau fare e to ratou mau fenua i te pape pue. Te faaamu-atoa-hia nei te mau taata mai te reira atoa te rahi i roto i te mataenaa ra o Saitama, e ua parauhia e ua tausani te taata i pau to ratou mau fare i tera vahi i tera vahi, aita râ i taiohia te rahiraa. Ua pau hoi te oire Fukuohiyama i te pape pue, e vahi iti roa tei toe. Te ohipa Cherisetiano mau teie, oia hoi ia tauturu atu i te feia i roohia e te ati.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank Cutler, Imprimeur,

Rue Bréa et de la rue Dumont d'Urville, Papeete, Tahiti.